

CORONICA 2020

Coronica 2020 – part 10

MARTIN CANTIENI

Il 2020 èn succedidas chaussas stranas senza fin. La pli evidenta: Tuts portan mascras – perfin en bancas – malgrà ch'igl era anc avant curt en trend da vulair scumandar da zuppentar la fatscha. Ma anc in pèr detagls èn gia prest ids en emblidanza: Per l'emprima giada en l'istorgia dal turissem grischun ha la regenza grischuna appellà questa primavaira a tut ils turists e possessurs dad abitaziuns da vacanzas da restar giu la Bassa e da betg forsa visitar la «Ferienecke der Schweiz».

Ed ussa la pli nova: Entant che l'entira Europa preschenta novas restricziuns, tragli-scha la «Ferienecke» puspè sco pli baud: Rurnals e sutgeras funcziunan prest sco adina. Ma ils politichers furbers grischuns èn gia vegnids sin l'idea dad empruvar da spedir eventuels blessads da la pista directamain puspè en ils ospitals da la Bassa. Quels n'èn dentant betg stads intgantads dal deal.

Perfin cun la lingua èn capitadas chaussas curiosas. Cun la pandemia è era arrivada ina unda dad anglicissem tar nus: il lockdown, contact tracing, social distancing. E sa chape-scha era il homeoffice. Mo ch'i ha num per englais «working from home», nagin anglofon na schess «homeoffice». Ed apropos homeoffice: Questa primavaira ha la Confederaziun laschà savair ch'i saja en cas pussaivel da bloccar Netflix, sche la capaciad da l'internet n'avess betg da tanscher per il homeoffice!

Tge è la «C(o)ronica da l'onn 2020»? – Jon Bischoff (illustraziun) e Martin Cantieni (text) commenteschan e parodieschan per la FMR 12 eveniments ch'ans han occupà durant l'onn 2020. Jon Bischoff da Vicosoprano illustrescha la fin da mintga mais per la FMR il «Mais da pais». Martin Cantieni da Turitg ha tranter auter gudagnà quest onn la concorrenza litterara rumantscha «Premi Term Bel».

Curiusitads da la pandemia



ILLUSTRAZIUN JON BISCHOFF